



Samkomulag

um samstarf Hjúkrunarheimilisins Fellsenda og

Landspítala - háskólasjúkrahúss

Hjúkrunarheimilið Fellsendi annars vegar og Landspítali - háskólasjúkrahús (LSH) hins vegar gera með sér svofellt samkomulag um vistun hjúkrunarsjúklinga frá geðsviði LSH, vitjanir starfsmanna geðsviðs á Fellsenda og aðgengi starfsfólks Fellsenda að námskeiðum á LSH.

Markmið:

Með samkomulagi þessu áforma aðilar að bæta þjónustu við geðfatlaða hjúkrunarsjúklinga og ennfremur að stuðla að betri nýtingu sjúkrarúma og hjúkrunarrýma á báðum stofnunum með því að sjúklingum á geðdeildum LSH sem bíða eftir hjúkrunarrými verði boðin dvöl á Fellsenda. Jafnframt sinnir sérhæft starfsfólk geðsviðs vitjunum á Fellsenda og starfsfólki Fellsenda gefst kostur á að sækja námskeið skv. námsskrá LSH.

Forsendur:

Samkomulagið tekur mið af lögum um réttindi sjúklinga nr. 74/1997 og lögum um málefni aldraðra nr. 125/1999. Lögð er áhersla á að geðfatlaðir njóti góðrar og faglegrar þjónustu, sem starfsmenn Fellsenda og LSH veita í samræmi við tilmæli landlæknisembættisins. Á Fellsenda er starfrækt hjúkrunarheimili fyrir geðfatlaða einstaklinga. Á LSH bíður að jafnaði fjöldi sjúklinga eftir vistun í hjúkrunarrými, að lokinni sérhæfðri meðferð á spítalanum. Á sama tíma þarf Fellsendi símenntun fyrir starfsfólk sitt.

Framkvæmd:

Fellsendi tekur við geðfötluðum öldruðum og/eða langveikum sjúklingum m.a. frá LSH í laus rými. Allar beiðnir frá LSH um innlagnir á Hjúkrunarheimilið Fellsenda skulu berast fagteymi göngudeildar geðsviðs, með fullnægjandi upplýsingum um sjúkdómsástand. Ákvörðun um að bjóða einstaklingi frá LSH hjúkrunarrými á Fellsenda er í höndum hjúkrunarforstjóra og yfirlæknis Fellsenda að höfðu samráði við fagteymi göngudeildar geðsviðs.

Geðlæknir, geðhjúkrunarfræðingur og félagsráðgjafi göngudeildar geðsviðs að Kleppi sinna ráðgjöf við fagfólk Hjúkrunarheimilisins Fellsenda og koma mánaðarlega á staðinn til að veita sjúklingum stuðning og eftirlit og veita faglega ráðgjöf um meðferð sjúklinga.

Geðsvið LSH er reiðubúið að veita starfsfólki Fellsenda fræðslu um geðsjúkdóma og meðferð þeirra í samráði við stjórnendur á Fellsenda.

LSH hefur öflugt fræðslustarf fyrir ófaglærða starfsmenn, sbr. námsskrá LSH. Ófaglært starfsfólk á Fellsenda fær með samningi þessum sama aðgengi að fræðslustarfi LSH og ófaglærðir starfsmenn LSH. Kostnaður við fræðslu þessa er skv. verðskrá LSH.

Ef einstaklingur á Fellsenda þarfnast bráðþjónustu geðsviðs LSH er viðkomandi einstaklingur tilkynntur til fagteymis göngudeildar geðsviðs að Kleppi. Geðlæknir og geðhjúkrunarfræðingur sem sinna faglegri ráðgjöf við Fellsenda meta tilvik og ef viðkomandi einstaklingur þarfnast bráðainnlagnar á LSH mun deild 12 á Kleppi sinna viðkomandi sjúklingi.

Kostnaður:

Hjúkrunarheimilið Fellsenda greiðir LSH fyrir þjónustuna kr. 40.856 á mánuði sem uppfærist í samræmi við launavísitölu, sem og kílómetragjald skv. ákvörðun ferðakostnaðarnefndar ríkisins fyrir að hámarki 300 km akstur mánaðarlega.

Samningur þessi tekur gildi 1. apríl 2007 og gildir til eins árs, en mögulegt er að framlengja samningnum um eitt ár. Samkomulagið skal endurskoða eigi síðar en 1. janúar 2008.

Reykjavík, 1. apríl 2007

Theódór S. Halldórsson
framkvæmdastjóri Fellsenda

Magnús Pétursson
forstjóri LSH

Ína R. Þorleifsdóttir
hjúkrunarforstjóri Fellsenda

Eydís Sveinbjarnardóttir
sviðsstjóri hjúkrunar á geðsviði LSH

Hannes Pétursson
sviðsstjóri lækninga á geðsviði LSH